

Pinnguaatit ilaat pillugit Kalaallit Nunaannut inatsit

UAGUT MARGRETHE AAPPAAT, Guutip Saammaanneranik Danmarkip Dronningia,
nalunaarpugut:

Folketingip akuersissutigigaa Uagullu isumaqataalluta atsioripput inatsit imaattoq:

Kapitali 1

Inatsisip siunertarisai atuuffiilu

§ 1. Inatsisip siunertarisai

- 1) aningaasanoorluni pinnguaatinik atuineq ingasaassinerussanngitsoq,
- 2) inuusuttut inuilluunniit allat navianartorsiortut pinnguaatitigut atornerlunneqatsaalinissaat imaluunniit pinngitsuuisinnaaveersarnissaat,
- 3) pinnguaatinik atuisut illersorniarnissaat pinnguaatit naammaginantumik, akisussaassusilimmik paasiuminantumillu neqeroorutaasarnissaasa qularnaarnerisigut, aamma
- 4) inuiaqatigiinni torersuunissap qularnaarnissaa aamma pinnguaatit pinerluuteqarnernut ikorfartuutaanissaasa akornuserniarnissaa.

§ 2. Inatsit taamaallaat atuutinneqassaaq pinnguaatinut, inatsimmi taaneqartunut, peqataassagaanni pilliuteqarfiusarialinnut aamma Kalaallit Nunaanni neqeroorutaasunut imaluunniit aaqqissuunneqartunut, ilanngullugit angallatini, Kalaallit Nunaata oqartussaafigisaani ittuni.

Imm. 2. Radiukkut tv-kkulluunniit aallatitani eqquiniulluni unamminerni taamatut unammisitsineq radiukkut tv-kkulluunniit pingaarnertut aallakaatitaanngitsuni akiliut imm. 1 malillugu ”pilliut”itut naatsorsuunneqassanngilaq, akiliuteqarneq paasissutissiisarnermik imarisaannillu sullissiviit aqqutigalugit taakkununga atasumik akiliutissat imaluunniit mobilit pillugit akiliutissatigut sullissiviit nalunaaruteqarnerisigut pissappat aamma telefoniit normuannut ataatsimut ullormi unnuamilu ataatsimi tapiutitut akiliutissaaq 5 kr. sinnernagu.

Imm. 3. Inatsimmi pineqanngillat siunissami aningaasanut tunngasutigut iluanaarutaasinnaasut pillugit eqquiniunneq imaluunniit aningaasat annikitsuinnaat pillugit angerlarsimaffinni (privat) pinnguaateqarneq.

§ 3. Pinnguaatinik inatsimmi pineqartunik neqerooruteqarnissaaq imaluunniit aaqqissuussinissaaq akuerineqarnikkut aatsaat pisariaqarpoq, inatsimmi inatsisiniluunniit allani allatut malitassaqaanngippat.

§ 4. Inatsit manna malillugu akuersissut pinnguaatinik nakkutilliisuutitanit tunniunneqassaaq. Akileraartarnermut ministeri allaluunniit ministerimit tamatumunnga pisinnaatitaasoq pinnguaatinik nakkutilliisutut oqartussaassuseqarpoq.

Kapitali 2

Nassuiaatit

§ 5. Inatsimmi matumani makku pineqarput:

- 1) Eqqorniagassat (lotteri): Iliuseqarneq, tamatumani peqataasoq eqqueriataarsinnaalluni, aamma eqqueriataarnissaq nalaatsornerinnakkut pisinnaasoq.
- 2) Eqquiniunneq (væddemål): Iliuseqarneq, tamatumani peqataasoq eqqueriataarsinnaalluni, aamma eqqoriagassaalluni siunissami pisussap inernerisinnaasaa imaluunniit siunissami suup pisinnaanissaa.
- 3) Aningaasanik katersukkanik eqquiniunneq: Eqquiniunneq, tamatumani eqqugassat tamaasa ilaalluunniit akiliutinit katersukkat annertussusiat aalajangiisuutillugu eqqugassaasut, imaluunniit eqquisunut arlaliusunut agguanneqartussaasut.
- 4) Qarasaasiatigut pinnguaatit: Pinnguarnarit pinnguartup unammillertillu ungasissumut attaveqaatitigut pinnguarnarisaat, tamatumani eqqueriataarsinnaaneq nalaatsornikkut imaluunniit nalaatsornikkut piginnaassuseqarluarnikkullu pisinnaasoq.

Kapitali 3

Pinnguaatinut ataasiakkaanut akuersissutit

§ 6. Eqqorniagassanik aamma hiistinik qimminillu sukkaniuutitsinerni eqquiniunnissanik neqeroorutitut akuersissut Danske Spil A/S-imut tunniunneqarsinnaavoq. Akuersissummi taamaallaat pineqarsinnaapput eqqorniagassanik pineqartutut ittunik aamma hiistinik qimminillu sukkaniuutitsinerni ajugaaniunnernik neqerooruteqarnerit Danske Spil A/S-imut Danmarkimi neqeroorutaasussatut akuersissutaasut.

Imm. 2. Akuersissut akileraartarnermut ministerip akuersineratigut tamakkiisumik ilaannaasumilluunniit tunniunneqarsinnaavoq Danske Spil A/S-ip pigisaatut piginneqatigiiffimmut.

§ 7. Eqquiniunnernik aamma qarasaasiatigut kasinonik ingerlatsinissamut akuersissut tunniunneqarsinnaavoq.

Imm. 2. Imm. 1 malillugu akuersissut taamaallaat tunniunneqarsinnaavoq pinnguaatinik neqeroorutilinnut, ukiuni arlalinni Danmarkimi eqquiniunnernik aamma qarasaasiatigut kasinonik ingerlatsinissamut akuersissutaateqareersunut, tamatumani pineqartut taamaallaat tassaassapput eqquiniunnernik aamma qarasaasiatigut kasinonik neqerooruteqarnerit pineqartutut ittut danskit akuersissutaanni pineqartut.

§ 8. § 6-imi aamma § 7-imi taaneqartutut akuersissutit saniatigut eqquiniunnernik aamma qarasaasiatigut kasinonik ingerlatsinissamik neqeroorutitut Kalaallit Nunaanni akuersissut tunniunneqarsinnaavoq inunnut Kalaallit Nunaanni najugalinnut, aamma piginneqatigiiffimmut il. il. (inatsisitigut ingerlatsisuusunut) Kalaallit Nunaani pilersitaasunut. Akuersissut ukiut ataasiakkaarlugit tunniunneqartassaaq akileraaruteqaataasussatullu pinnguaatitigut isertitat 1.000.000 kr.-init annertunerussanngillaq.

Imm. 2. Qarasaasiatigut kasinot neqeroorutigisinnaavaat roulettet, baccarat, punto banco, black jack, poker aamma qarasaasiatigut kasinomi spilleautomatini eqqugassartalittut pinnguaatit. Pinnguaatinut allatut ittunut akuersissuteqartoqarsinnaavoq, soorlulu akuersissutit ataasiakkaat pinnguaammut ataatsimut arlalinnuunniit killiliiffineqarsinnaalluni.

Imm. 3. Imm. 1 malillugu akuersissummik neqeroorutigineqarsinnaanngillat hiistinik qimminillu sukkaniuutitsinermi, tuinik timmisitsinikkut unammisitsinerni aamma eqqorniagassat inernerinik allatulluunniit nalaatsornikkut pilersitatut pisussanik eqquiniarnissaq qarasaasiatigut piviusuusaartitatut timersuuteqarnerit inernerisaannik nunami eqquiniaasitsinerit eqqaassanngikkaanni.

Imm. 4. Imm. 1 malillugu akuersissut taamaallaat tunniunneqarsinnaavoq inunnut

- 1) 21-nik ukioqalereersimasunut,
- 2) nammineersinnaanermik arsaagaasimasunut imaluunniit pigisat tungaasigut siunnersortissaligaasunut, tak. nammineersinnaassuseqarneq pillugu inatsimmi Kalaallit Nunaanni atuuttumi § 2 aamma § 53,
- 3) akiliisarnermik unitsitsisimanermik nalunaaruteqarsimangitsunut, akuerineqartariaqartumik isumaqatigiissusiornissaq, akiliisinnaajunaartutut nalunaarutigineqarnissaq pillugu qinnuteqarsimangitsunut, imaluunniit akiitsutigut isumakkeerneqarnissaq pillugit qinnuteqaammik tunniussaqaarsimangitsunut imaluunniit akiliisinnaajunnaaqanermi suliarineqarnissaq, akiitsutigut isumakkeerneqarnissaq imaluunniit akuerineqartariaqartumik isumaqatigiissusiornissaq pillugit qinnuteqarsimangitsunut,
- 4) akiliisitassatut eqqartuussaasimangitsunut imaluunniit pissutsit pinnguaatinik suliaqarsinnaatitaanikkut atornerluinissamut aarlerinarsinnaasut pissutigalugit Kalaallit Nunaanni pinerluttulerinermik inatsit malillugu pineqaatissitaanngitsunut, aamma
- 5) pisortanut akilerneqartussanngoreersunik akiitsoqanngitsunut.

Imm. 5. Imm. 1 malillugu akuersissut taamaallaat tunniunneqarsinnaavoq piginneqatigiiffinnut il. il. (inatsitigut aqutsisulinnut) imm. 4-mi, nr. 3-5-imi patsisissaatitanik naammassinnittunut aamma imm. 4, nr. 1-5-imi patsisissaatitanik naammassinnittunik pisortaqaarfimmini siulersuisuminnilu ilaasortalinnut. Siulersuisuni nutaamik ilaasortanngortoqarpat imaluunniit pisortaqaarfimmi nutaamik atorfinitsitsisoqarpat tamanna pinnguaatinik nakkutilliisuutitanut nalunaarutigineqassaaq ullut 14-it qaangiutsinnagit.

Imm. 6. Pinnguaatinik nakkutilliisuutitat aalajangiisnaapput piginneqatigiiffinni il. il. (inatsitigut aqutsisulinni) siulersuisuni pisortaqaarfimmiluunniit ilaasortaasoq siulersuisuniit pisortaqaarfimmiilluunniit tunuassasoq, ilaasortaqa taanna akiliisitassatut eqqartuunneqarpat imaluunniit pissutsit pinnguaatinik suliaqarsinnaatitaanikkut atornerluinissamut aarlerinarsinnaasut pissutigalugit Kalaallit Nunaanni pinerluttulerinermik inatsit malillugu pineqaatissitaappat, imaluunniit pisortanut akilerneqartussanngoreersunik akiitsoqarpat 100.000 kr.-nit amerlanerusunik.

Imm. 7. Piginneqatigiiffinni il. il. (inatsitigut aqutsisulinni) siulersuni pisortaqaarfimmiluunniit ilaasortaasoq siulersuniit pisortaqaarfimmiilluunniit tunuassaaq, ilaasortaasup taassuma imm. 4, nr. 2-mi aamma 3-mi patsisissaatitat naammassisinnaajunnaarpagit.

Imm. 8. Pinnguaatinik neqeroorteqarnissamut aaqqissuussinissamullu akuersissut taamaallaat tunniunneqarsinnaavoq qinnuteqartunut pinnguaatinik ingerlataqarnissamut aningaasatigullu suliatigullu isumannaatsuusorinartunut.

Imm. 9. Akuersissut tunniunneqarsinnaanngilaq qinnuteqartoq, pisortaqaarfimmi siulersuisuniluunniit allaniluunniit sullivimmik ingerlatsinermut aalajangiisuusutut sunniuteqarsinnaasorisanut, pissusilersornermikkut isumaqalersitsisinnaasunut sullivik isumannaatsumik ingerlanneqarsinnaanngitsoq.

§ 9. Nunagisami cykelinik sukkaniuttarfinni sukkaniunnerni, qimminik oqilaniuttarfinni oqilaniutsitsinerni, tuinik timmillaqqinnequsaatsitsinerni hiistinillu oqilaniutsitsinerni eqquiniutitut akiliutinit katersanik eqquiniartitsinissanut akuersissut tunniunneqarsinnaavoq.

Imm. 2. Imm. 1 malillugu akuersissut ukiut pingasukkuutaarlugit ukiunilu ataasiakkaani ulluni aalajangersimasunik amerlassusilinni atuuttussatut tunniunneqarsinnaavoq.

Imm. 3. Pisussaq eqquiniuffiusussaq pissappat ungalulersukkatut sukkaniuffissami, eqquiniutitut akiliuteqarneq taamaallaat pissaaq tassani pisussamullu attuumassutilittut. Pisussaq eqquiniuffiusussaq ungalulersukkatut sukkaniuffissami pissanngippat eqquiniutitut akiliuteqarneq aatsaat pisinnaassaaq sumiiffimmi politiinit akuerisami aatsaallu ullormi pisussap piffissaani ullormik ataatsimik sioqutsisumik poliinit akuerisaasumi.

Imm. 4. Akuersissut piginneqatigiiffinnut il. il. (inatsisitigut aqutsisulinnut) cykelinik sukkaniuttarfimmi sukkaniutsitsinissamik, qimminik oqilaniuttarfimmi oqilaniutsitsinissamik imaluunniit tuinik timmillaqqinniutsitsinissamik aqqissuussisunut, aamma timersuutip pineqartup pingaarnertut kattuffeqarfianut attuumassuteqartunut taamaallaat tunniunneqarsinnaavoq. Najugarisami hiistinik sukkaniutsitsinissami eqquniutitut akiliutinit katersanik eqquniunnissamut akuersissut taamaallaat tunniunneqarsinnaavoq peqatigiiffinnut ukiuni arlalinni taamatut akuerineqartareersimasunut.

§ 10. Kalaallit Nunaanni pinnguaatinik neqerooruteqarnissamut akuersissut, tak. § 6 aamma § 7, imm. 1, atorunnaassaaq pinnguaatinik pineqartutut ittunik Danmarkimi taamatulli neqerooruteqarnissamut akuersissut pinnguaatit pillugit inatsit naapertorlugu arsaarinnissutaappat imaluunniit atorunnaarpat.

Imm. 2. Kalaallit Nunaanni pinnguaatinik neqerooruteqarnissamut akuersissut pinnguaatinik nakkutilliisuutitanit arsaarinnissutaasinnaavoq, tak. §§ 6-9, akuersissutaatillip pinnguaatinik neqerooruteqarnera innuttaaqatigiinni toqqissisimasuunissamut annertuumik akornusiippat imaluunniit akuersissutaatilik taassumaluunniit sinnisua

- 1) inatsimmik matuminnga, inatsit taanna malillugu peqqussutaasunik imaluunniit akuersissummut patsissaatitanik unioqqutiserujussuarpat arlaleriarluniluunniit unioqqutitsisarsimappat,
- 2) akileraarutitik, tak. § 28 aamma § 29 kapitali 8-lu, sumiginnaarujussuarpat imaluunniit arlaleriarluni sumiginnaasarsimappat,
- 3) akiliutissanik, tak. § 25, akilerneqartussanngoreersunik akiliinngippat,
- 4) pinerluttulerinermik inatsit malillugu pineqaatissitaappat, pinnguaatinik suliaqarsinnaatitaanermik atonerluinissamut aarlerisutsitsilissutaasumik,
- 5) pinnguaatinik aningaasatigut suliatigullu isumannaatsumik neqerooruteqarsinnaasutut imaluunniit aqqissuussisinnaasutut isumaqarfiginarunnaarpat imaluunniit
- 6) pisortanut 100.000 kr.-it sinnerlugit akilerneqartussanngoreersunik akiitsoqarpat.

Imm. 3. Pinnguaatinik Kalaallit Nunaanni neqerooruteqarnissamut akuersissut, tak. §§ 6-9, atorunnaassaaq

- 1) akuersissutaatilik nalunaaruteqarpat pinnguaatinik Kalaallit Nunaanni neqerooruteqarnissaq kissaatigiunnaarini,
- 2) akuersissutaatilik toquppat, namineersinnaajunnaarsitaappat imaluunniit pigisat tungaasigut siunnersortissaligaappat, akiliisarnerup unitsinneqarneranik nalunaaruteqarpat, akiligassatigut akuersineqartariaqartumik isumaqatigiissusiornissaq, akiliisinnaajunnaartutut imaluunniit akiitsutigut isumakkeerinissaq imaluunniit akiliisarnermik unitsitsineq imaluunniit akiitsutigut akuerineqartariaqartumik isumaqatigiissusiorneq pillugit nalunaarutigineqarnissamik qinnuteqaammik tunniussaqqarpat imaluunniit
- 3) sullivimmik pinngitsaaliinikkut atorunnaarsitsinissamik aalajangiisoqarpat.

Imm. 4. Imm. 3, nr. 2, apeqqutaatinnagit akuersissutaatillip toqusup pigisaanik isumaginnittup imaluunniit aapparisaata niksinnagit pigisanik piginnilersup, akuersissutaatillip akiliisarnermiik unitsitsinermik nalunaarsimasup pinnguaatinik neqerooruteqartarnera ingerlatiinnarsinnaavaa ingerlatsinerup unitsikkiartuaarnissaa siunertaralugu, tamatuminnga pinnguaatinik nakkutilliisuutitat toqusup toquneraniit ullut 14-it qaangiutsinnagit nalunaarfigineqarpara, ilanngullugit akiliisarnermik unitsitsinermik, akiliisinnaajunnaarnerup tamanut nalunaarutaaneranik imaluunniit sinniisitut isumaginnitseqalernermik nalunaarutiginnereernermik. Tamatumunnga pisinnaatitaaneq atuutissaaq pisimasup akuersissutip atorunnaarneranik nassataqartup pineraniit sivisunerpaamik qaammatini arfinilinni.

§ 11. Pinnguaatit pyramidinik taaneqartartut inerteqqutaapput. Pinnguaatinik pyramidinik pineqarput aaqqissuussinerit tamatumani

- 1) peqataanissaq aningaasanik allanilluunniit aningaasanik nalilinnik akiliuteqarfiusariaqartoq,
- 2) peqataasut aningaasatigut eqquinissaannik ilimasaarneqarsinnaasut aamma
- 3) taamatut eqqorsinnaasaat peqataasut namminneq akiliutaannit pinngorfeqarnerusut.

Kapitali 4

Aqutsisunik sulisussanillu akuersissutiginninneq

§ 12. Pisiniarfinnik, eqqorniagassanik eqquiniarnissanilluunniit nioqquteqarfiusunik, tak. §§6-8, ulluinnarni ingerlatsisuusutut pineqarput akuersissutaalik nammineq imaluunniit sinnerluni aqutsisorisaa. Aqutsisuusooq atorfinitsitsineqalersinnagu pinnguaatinik nakkutilliisuutitanit akuersissutaassaaq. Akuerineqarnissamat patsisissaassaaq aqutsisuusup § 8-mi, imm. 4, nr. 1-imi, 2-mi 4-milu patsisissaatitanik naammassinnissimanissaa.

Imm. 2. Aqutsisussaaq akuerineqarsinnaassanngilaq, aqutsisuusooq nammineq allalluunniit aqutsisuusup sulineranut aalajangiisuusumik sunniiviginnissinnaasut pissusilersuuteqarsimappata pinnguaateqarfiusup isumannaatsumik ingerlanneqarnissaanut qulalersitsisunik.

Imm. 3. Aqutsisuusooq akuerisaaq pinnguaatinik nakkutilliisuutitanut ilisimatitsissaaq § 8-mi, imm. 4, nr. 2-mi patsisissaatitat naammassisinnaajunnaarunigit.

Imm. 4. Aqutsisuusumik akuersissut uterteqquneqarsinnaavoq aqutsisuusup imm. 2-mi patsisissaatitat nammassisinnaajunnaarpagit imaluunniit pissutsit pinnguaatinik suliaqarnissami atornerluisinnaanermut aarlerinartorsiortitsisut pissutigalugit Kalaallit Nunaanni pinerluttulerinermik inatsit malillugu pineqaatissitaappat.

Imm. 5. Aqutsisuusumik akuersissut atorunnaassaaq, aqutsisuusup § 8-mi, imm. 4, nr. 2-mi patsisissaatitat naammassisinnaajunnaarpagit.

§ 13. Pisiniarfinni, eqqorniagassanik eqquiniutinillu nioqquteqarfiunerusuni sulisuusut 18-inik ukioqalereersimasuussapput.

Kapitali 5

Paasisutissiinissamat pisussaaneq, tuniniaaneq pilerisaaruteqartarnerillu

§ 14. Akuersissutaalik pinnguaatit pillugit, ilanngullugit pinnguaatinut malittarisassat, tamanik paasisutissiissaaq, pinnguaatinik atuisumit pisortaniillu takoriaannaasunik.

§ 15. 18-it inorlugit ukiulinniit pinnguaatinut akiliuteqartitsinissaaq allatullu inuit taama ittut peqataatinnissaannut akunnermiliunnissaaq inerteqqutaavoq, taamaattoq tak. imm. 2.

Imm. 2. Nunami tamarmiusumi eqqorniagassat, tak. § 6, pillugit 16-ilereersimasunut akiliuteqartitsinissaaq allatullu eqqorniaasitsinerni peqataanissamat akunnermiliunnissaaq inerteqqutaanngilaq.

§ 16. Pinnguaatini peqataanissamat akuersissutaalik akiligassarsisitsissanngilaq.

§ 17. Pinnguaatinik piseqqusaarinermi

- 1) eqqueriataarnissaaq eqqortumik oqimaaqatigiissaarisumillu saqqummiunneqartassaaq, taamaalilluni isumaqartoqaleqqunagu eqqueriasaarnissaaq piviusussaniit annertunerusooq,

- 2) pinnguaatit aliikkutassatut neqeroorutigalugit saqqummiunneqartassapput,
- 3) attaveqaatitigut imaluunniit tusagassiutit arlaasigut meeqqat inuusuttullu 18-iliisimangitsut sunnernerneqassanngillat,
- 4) inuit ilisimaneqartut arlannaalluunniit eqqunngitsumik sakkuginiarneqassanngilaq pinnguaatini peqataanikkut taassumatulli ilisimaneqalernissaq siunertaralugu, aamma
- 5) isumaqalersitsiniartoqassanngilaq pinnguaatini peqataanikkut aningaasatigut ajornartorsiutit qaangipallanneqarsinnaasut imaluunniit peqataasut innuttaaqatigiinni akuersarneqarnerulissasut.

Imm. 2. Akileraartarnermut ministeri pinnguaatinik piseqqusaarineq pillugu erseqqinnerusunik malittarisassiorsinnaavoq.

Kapitali 6

Pinnguaatinik neqerooruteqartarnermut tunngasutigut aalajangersakkat allat

§ 18. § 8 malillugu akuersissuteqarnissamut patsisissaatitat aalajangersarneqarsinnaapput.

§ 19. Akileraartarnermut ministeri pisut aalajangersimasumik pissusillit eqquniutaannginnissaat pillugu malittarisassiorsinnaavoq aamma pinnguarnert ingerlannissaallu pillugit erseqqinnerusunik malittarisassanik, ilanngullugit akiliutissat eqqugassallu, malittarisassanik utertitsilluni akiliutissat procentii, nakkutilliinikkut iliuusissat, inatsisip naammassiniarnerani pisariaqartinneqartussat, teknikikkut atortunik, pinnguarnermi atugassanik akuersissutiginninneq inissitsiterinerlu, paasissutissiisussaanerit, pinnguaatini peqataasut aningaasaataasa innarlitsaaliornissaanni iliuusissat, pinnguarnerni peqataasunik nalunaarsuineq, paasissutissanik toqqortarinninneq, naammagittaalliuutinik suliarinninneq, akuersissutaatillit sulisorisaasa pinnguarnerni peqataanerit pillugit, aamma pinnguaatinik eqqunngitsumik neqerooruteqartumut peqataanissami akiliutissanik eqqugassanillu taassumannaanniillu akiliisitsiniartarneq pillugit kiisalu aningaasanik peqquserlunnikkut pissarsianik inatsisinut naapertuuttunngorsaasarnerup pitsaaliornissaa pillugu erseqqinnerusumik malittarisassanik.

§ 20. Pinnguaatinik nakkutilliisuutitat pinnguaatinik neqerooruteqarnermut tunngasutigut inatsimmi aalajangersakkat eqquutsinneqarnissaat nakkutigissavaat, § 19 naapertorlugu akuersissutaatilinnut peqqussutini aalajangersakkatigut aamma patsisissaatitat aalajangersakkatigut.

Imm. 2. Pinnguaatinik nakkutilliisuutitat taakkualuunniit sinnerlugit pineqartunut tunngasutigut Kalaallit Nunaanni nakkutilliisuutitat sukkulluunniit kiussutsimut uppenarsaammik eqqortumik takutitsinikkut eqqartuussivik aalajangiinnikkaluaq pisinnaatitaassapput ininut pinnguaatinik neqerooruteqarnermut aaqqissuussinermullu atasumik akuersissutaatilimmit akisussaaffigisatut atorineqartunut isersinnaatitaassapput aamma pinnguaatinut atasumik teknikikkut atortunik, naatsorsuutinik allattugaatinillu allatigullu pappialaatinik, nakkutilliinermut pingaarutilinnik misissuisinnaatitaassapput, paasissutissat tamakkua pappialanut naqitaaneri qarasaasianiluunniit toqqortaanerat apeqqutaatinnagu.

Imm. 3. Akuersissutaatilik taassumalu sulisorisai imm. 2-mi taaneqartutut nakkutilliisuutitanut misissuinerini pisariaqarneratut ilitersuillutillu ikiutissapput.

Imm. 4. Nakkutilliisuutitat imm. 2-mi taaneqartut akuersissutaatilimmut peqqusisinnaapput pinnguaatinik ingerlatsineq pillugu paasissutisseqqullugu aamma imm. 2-mi taaneqartutut atortussanik tunniusseqqullugu nassitseqqulluguluunniit qinnuigisinnaallugu.

Imm. 5. Pinnguaatinik neqeroorutaqarnissamut atortulersuutinik pilersuisuusut atukkiussisuusullu qinnuigineqarnikkut imm. 2-mi taaneqartutut nakkutilliisuutitanut paasissutisseequneqartassapput akuersissutaatilinnut inatsimmi matumani pineqartutut pilersuutitik pillugit.

Imm. 6. Akileraartarnermut ministeri Kalaallit Nunaanni Namminersortunut isumaqatigiissuteqarsinnaavoq pinnguaatinik neqerooruteqarnernut tunngasutigut nakkutilliinermik isumaginninnissamut paasissutissanillu ingerlatitseqqittarnissamut erseqqinnerusumik malittarisassat pillugit.

§ 21. § 20, imm. 2 malillugu misissuisarnissanut politiit ikiutissapput.

§ 22. Eqquiniunnernik neqeroorutinut imaluunniit qarasaasiatigut kasinonik ingerlatsinermut, tak. § 7, akuersissummik piginnittuusut akuersissummik atuilereernermit ukioq qaangiuppat nalunaarusiussapput, akuersissutaatillip ukiumi qaangiuttumi akuersissummi patsisissaatitanut naapertuuttumik pinnguaammik neqerooruteqarsimasinnaaneranut nassuiaataasunik. Nalunaarusiaq suliarineqassaaq sullivimmit pinnguaatinik nakutilliisuutitanit akuerisamit. Nalunaarusiaq pinnguaatinik nakkutilliisuutitanit tiguneqareersimassaaq akuersissutip atuutilerfiatut ullormiit kingusinnerpaamik qaammatit 14-it qaangiunneranni.

Imm. 2. Eqquiniunnernik imaluunniit qarasaasiatigut kasinonik ingerlatsinissamut, tak. § 7, akuersissummik pigisallit, ukioq siullesq qaangiuppat kingusinnerpaamik ukiut naatsorsuusiortit tamatigut naareernerisigut qaammatit marluk qaangiuppata ukiumoortumik nalunaarusiamik sulliviup naatsorsuutaasa pingaarnertut kisitsisitaanni tamanut saqqummiussisassapput aamma akuersissutaasumik qanoq iliornikkut inatsimmi pumasaqaataasunik malinnissimanera pillugu nalunaarusiamik.

Kapitali 7

Akiliutit

§ 23. Eqquiniunnissanut aamma qarasaasiatigut kasinonik ingerlatsinissamut, tak. § 8, akuersissutinut tunngatillugu pinnguaatinik nakkutilliisuutitat qinnuteqaatinik suliarinninnerini, akuersissutinik suliarinninnerini aamma akuersissutaatillimmik nakkutilliinerini tamarmiusumik aningaasartuutaannut matusissutissatut akiliutigineqassapput 50.000 kr.-it. Akiliutit taakku inuinnaat il. il. aningaasarsianit akileraarutaat pillugit inatsimmi § 20 malillugu iluarsivigineqassapput.

Imm. 2. Akiliutissat akilerneqassapput kingusinnerpaamik qinnuteqaammik tunniussaqaarnermut peqatigitillugu. Qinnuteqaat itigartinneqarpat qinnuteqartumut 25.000 kr.-it utertissutaassapput. Aningaasat inuinnaat il. il. aningaasarsianit akileraarutaat pillugit inatsimmi § 20 malillugu iluarsivigineqassapput.

Kapitali 8

Akileraarutit

§ 24. Kalaallit Nunaanni eqqorniagassanik neqerooruteqarnissamut akuersissummik piginnittoq, tak. § 6, eqqorniagassatigut eqqugassatut isertitanit akileraarutinik danskit naalagaaffianut akiliuteqassaaq eqqugassat aningaasartaasa ilaasa 200 kr.-ninit amerlanerusut 15 pct.-iannik.

§ 25. Kalaallit Nunaanni eqquiniunnernik qarasaasiatigullu kasinonik neqerooruteqarnissamut akuersissummik piginnittut, tak. §§ 7 aamma 8, danskit naalagaaffiannut akileraarummik akiliuteqassapput tamakkiisumik isertitat 20 pct.-iannik, taamaattoq tak. imm. 2 aamma 3.

Imm. 2. Eqquiniutsitsinernit, tamatumani peqataasut qarasaasiakkut ingerlatamik akunnerminni eqquiniutilersinnaangorlugit naatsorsuussanit, imm. 1-imi taaneqartutut akileraarutissaq naatsorsorneqassaaq aningaasanit akuersissutaatilimmut isumagisassanngortitaasunit.

Imm. 3. Qarasaasiatigut kasinomi pinnguaatinit, tamatumani eqqugassat akuersissutaatilimmit isumagineqartussaatiillugit imm. 1-imi taaneqartutut akileraarutissaq naatsorsorneqassaaq aningaasanit akuersissutaatilimmut isumagisassanngortitaasunit.

§ 26. Eqquiniunnerni peqataasut akiliutaannit katersanik eqquiniunniunnissamik neqeroorutinut akuersissutinik piginnittut, tak. § 9, peqataaniartut akiliutaasa 11 pct.-iat akileraarutit akileqartassaaq ullormut eqquiniutsitsiviusumut ataatsimut 20.000 kr.-it (2010-mi annertussuseq) ilanngaatilugit. Annerpaamilli qaammatsiutit ukiuata ataatsip ingerlanerani ullut equiniutitsiviit 24-t ilanngaataasassapput. Ilanngaatit aningaasartaat inuinnaat il.il. aningaasarsianit akileraarutaat pillugit inatsimmi § 20 malillugu iluarsivigineqartassapput.

Kapitali 9

Nalunaarsuineq, akileraarutinik isumannaarineq akiliisitsiniartarnerlu

§ 27. Inuit aamma piginneqatigiiffiit il. il. (inatsisitigut aqutsisorisaat), inatsit manna malillugu akileraaruteqartussaasut, tamannalu sioqqullugu pinnguaatinik neqerooruteqarnermik ingerlatsineq pillugu Danmarkimi akileraarusiisarnermi akileraarutitigullu aqutsisoqarfimmi nalunaarsorneqarsimanngitsut, akileraaruteqaataasussatut ingerlatsinertik aqutsisoqarfimmut tassunga nalunaarutigissavaa pinnguaatitigut eqquiniutitsinissamut akuerineqarnermiit kingusinnerpaamik sapaatit akunnerisa 4-t qaangiutinnginneranni, pinnguaatitigullu eqquiniutitsinissap aallartinnissaa sioqqullugu.

Imm. 2. Imm. 1 malillugu nalunaarsorneqarneq atorunnaassaaq, Kalaallit Nunaanni pinnguaatinik neqerooruteqarnissamut akuersissut uterteqquneqarpat imaluunniit atorunnaarsitaappat imaluunniit akileraaruteqaataasussatut ingerlatsineq unitsinneqarpat.

Imm. 3. Paasissutissani nalunaarsugassatut nassiutani allannguutit akileraarusiisarnermi akileraarutitigullu aqutsisoqarfimmut nalunaarutigineqassapput allannguinnermiit kingusinnerpaamik ullut 8 qaangiutsinnagit.

§ 28. Eqqorniagassat § 24-mi taaneqartut aamma eqquiniunnerit qarasaasiatigut kasinoni pinnguaatit § 25-mi taaneqartut pillugit piffissaq akileraaruteqarfissaq sapaatip akunneraa (ataasinngornermiit sapaammut).

Imm. 2. Akileraarutissaq nalunaarutigineqassaaq akilerneqassarlugu piffissap akileraaruteqarfissap naaneraniit kingusinnerpaamik ullut 5 qaangiutsinnagit. Kingullertut nalunaaruteqarneq aamma ulloq akiliiffissaq nalliuttuussappat nalunaaruteqarneq akiliinerlu pissapput ulluinnarmi tulluuttumi siullermi. Pinnguaatinik neqeroorutilik, inatsit manna malillugu akileraaruteqarnissamut pisussaasoq, eqqorniagassat, eqquiniutitsinerit qarasaatigullu kasinomi pinnguaatit Danmarkimi neqeroorutaasut assinginit nalunaarutiginnillunilu akileraarutinik akiliissappat, akileraarutissat inatsit manna malillugu nalunaarutigineqarlunilu akilerneqassaaq pinnguaatit Danmarkimi neqeroorutaasut pillugit akileraarutissat ilanngullugit.

Imm. 3. Inuinnaat aamma piginneqatigiiffiit il. il. (inatsisitigut aqutsisorisaat), pinnguaatinik akissarsiassartaat akileraaruteqaataasussanik neqeroorutillit, akissarsiartassaasa aningaasanngorlugit

eqquisunut akilerneranni akileraarutissaq unitsittassavaat. Eqquisup akissarsiassaanik akiliinerni akileraarutissatut naatsorsukkat aningaasartaat koruuninut ilivitsunut qaninnerpaanut akunnaallillugu annikillineqartassaaq.

Imm. 4. Akileraaruteqartussaannermi eqqugassat tamarmik pineqarput, aaneqarnissaat aaneqannginnissaalluunniit apeqqutaatinnagu. Taamaattorli eqqorniagassatigut eqqugassat lodsedleni tunineqanngitsuniippata akileraarutit akilerneqassanngillat. Taamatulli akileraarutit akilerneqassanngillat eqqorniagassatigut eqqukkani aaneqanngitsuni, taakku aaneqanngitsutulli eqqugassanut tulliuuttunut ilanngunneqassappata.

§ 29. Eqquiniunnerni peqataasut akiliutaannit katersukkat § 26-mi taaneqartut pillugit piffissaq akileraaruteqarfissaq sapaatip akunneraa (ataasinngornermiit sapaammut).

Imm. 2. Akileraarutissat nalunaarutigineqarlunilu akilerneqassaaq piffissap akileraaruteqarfissap naaneraniit kingusinnerpaamik ullut 15-it qaangiutsinnagit, piffissami tassani eqquiniunnerni peqataasut akiliutaannit katersukkanik eqquiniunnissaq neqeroorutaasimappat. Kingullertut nalunaaruteqarneq aamma ulloq akiliiffissaq nalliuttuussappat nalunaaruteqarneq akiliinerlu pissapput ulluinnarmi tulliuuttumi siullermi.

§ 30. Nalunaarutiginninneq akiliinerlu piffissaq eqqorlugu pinngippata Danmarkimi akileraarusiisarnermi akileraarutinillu aqutsiveqarfimmit pinnguaatinik nakkutilliisuutit tamatuminnga nalunaarfigineqassapput.

Kapitali 10

Akileraarutinut tunngatillugu allaffissornikkut aalajangersakkat

§ 31. Pinnguaatinik neqeroorutilik, inatsit manna malillugu akileraaruteqartussaasoq, naatsorsuusiussaaq, akileraarutissat naatsorsornissaannut akileraarutillu iluarsiviginissaasa nakkutiginnissaannut tunngavissisinnaasunik.

§ 32. Danmarkimi akileraarusiisarnermi akileraarutinillu aqutsiveqarfik akileraarutissap nalunaarutigineranik akilerneranillu il.il. nakkutilliisuussaaq.

Imm. 2. Danmarkimi akileraarusiisarnermi akileraarutinillu aqutsiveqarfiup imaluunniit taanna sinnerlugu Kalaallit Nunaanni taamatulli oqartussaasut sukkulluunniit kinaassutsimut uppersaammik eqqortumik takutitsinikkut eqqartuussivik aalajangiinngikkaluaq inini inuinnaat piginneqatigiiffiillu il. il. (inatsisitigut aqutsisorisaat) atugaanni misissuisinnaatitaallutillu taakkua tunisatigut allattuiffiiniq, naatsorsuutaanniillumi, allaffigeqatigiissutaannik pappialatigullu uppersaatiniq allanik misissuisinnaatitaassapput, akileraarutit iluarsisutissartaasa naatsorsornissaannut pingaaruteqarsinnaasunik.

Imm. 3. Sullivinnik nalunaarsukkanik piginnittuusut sullivimmilu pineqartumi sulisuusut pisortatut oqartussaasunut imm. 2-mi taaneqartunut misissuinerini pisariaqarneratut ikiuutissapput.

Imm. 4. Atortussat imm. 2-mi taaneqartut pisortanit oqartussaasuniit qinnuigineqarnikkut taakkununga tunniunneqassapput nassiunneqarlutilluunniit.

Imm. 5. Inuinnaat aamma piginneqatigiiffiit il. il. (inatsisitigut aqutsisuusut) nalunaarsorneqarnissamut pisussaasut aamma atortunik il. il., ilanngullugit qarasaasianik, pilersisuusut attartortitsisullu qinnuigineqarnikkut misissuinerne atugassatut pisariaqarneratut tamanik paasissutissiissapput.

Imm. 6. Aningaaseriviit, advokatit allallu aqutsinermut aningaasarsisartut imaluunniit inuussutissarsiutigalugu aningaasanik atukkiisartut, qinnuigineqarnikkut pisortat misissuisitaannut

tamanik paasissutissiissapput sullivinnut nalunaarsorneqartussaasunut aqqi taasanut aningaasatigut isumannaagassaatik pillugit.

Imm. 7. Paasissutissat imm. 2-mi aamma 4-6-imi taaneqartunut naapertuuttut qarasaasiani nalunaarsugaappata, pisortat misissuisuutitaat pineqartunik misissuisinnaanermisulli qarasaasiami paasissutissanik misissuisinnaatitaassapput.

Imm. 8. Akileraartarnermut ministeri malittarisassiorsinnaavoq § 27 malillugu inuinnarnik aamma piginneqatigiiffinnik il. il. (inatsitigut aqutsisuusunik), nalunaarsuisarneq pillugu, akileraarutunik nalunaarutiginninneq akiliisarnerlu pillugit, aamma naatsorsuutitut tunngasunik toqqortarinninneq naatsorsuusiortarnerlu pillugit, ilanngullugit peqataasunit akiliutit eqqogassallu pillugit naatsorsuisarneq pillugu.

Kapitali 11

Kalaallit Nunaanni pinnguaatiniit Kalaallit Nunaanni Namminersortunut aningaasaliissutit

§ 35. Kalaallit Nunaanni pinnguaatinik neqerooruteqarnertut inatsit manna naapertorlugu akuerisanut tunngatillugu danskit naalagaaffiat Kalaallit Nunaanni Namminersortunut ukiumoortunik aningaasanik nuussisassaaq. Aningaasat taakku naapertuutissapput Danske Spil A/S-imit ukioq naatsorsuusiortarfik 2010 tunngavigalugu 2011-mi Kalaallit Nunaanni Namminersortunut pinnguaatit ilaat, eqqorniagassat eqquiniunnerillu pillugit inatsimmut naapertuuttumik.

Imm. 2. Imm. 1-imi aningaasat pineqartut iluarsiivigineqassapput pisiassat akiisa allanguutaannik. Procenti naatsorsorneqassaaq 1 decimal-imek. Taamaalilluni aningaasat iluarsiivigisat koruuninut qaninnerpaanut qummut 1 millionimek agguarneqarsinnaasumut akunnaallineqartassapput.

Imm. 3. Aningaasanut ministeri aamma akileraartarnermut ministeri 1. januar 2016 nallertinnagu nalunaarsuissapput Kalaallit Nunaanni Namminersortunut imm. 1-imi taaneqartut aningaasaliissutissat kukkunersiorneqarumaarsinnaanerat siunertaralugu.

Imm. 4. Aningaasat imm. 1-imi taaneqartut Kalaallit Nunaanni Namminersortunit tamanut iluaqutissatut siunertanut agguanneqassapput, taamaattoq tak. imm. 5.

Imm. 5. Imm. 1-imi taaneqartut aningaasat ilaat, annertussutsimikkut 2003-mi Kalaallit Nunanni pinnguaatinit naalagaaffimmut akileraarutinit akilerneqartussanningsimasunit ukiumoortumik ataatsimut tapiissutinit ilanngaataasimasut Namminersortunit siunertanut allanut atorneqarsinnaapput.

§ 36. Kalaallit Nunaanni Namminersortut erseqqinnerusunik malittarisassiuissapput aningaasat § 35 malillugu inuinnat kattuffiitut il. il. agguanneqartussat pillugit naatsorsuutunik saqqumiussisarneq kukkunersuisarnerlu pillugit. Rigsrevisionimi atugassatut naatsorsuutunik peqqissaarnerusumik misissuisarnissamut sulii allatigut paasissutissanik Namminersortut pissarsiorsinnaapput.

Kapitali 12

Pinnguaatinik nakkutilliisuutit aalajangiinerinik naammagittaalliorneq

§ 37. Pinnguaatinik nakkutilliisuutit aalajangiinerinik naammagittaalliuutit ingerlateqqinneqarsinnaapput Nuna Tamakkerlugu Akileraarutit pillugit eqqartuussivimmut (Landsskatteretten-imut). Akileraarutunik aqutsineq pillugu inatsimmi § 13, imm. 3, taamatulli atortuutineqartassaaq pinnguaatinik nakkutilliisuutit aalajangiinerinik naammagittaalliuutitut.

§ 38. Pinnguaatinik nakkutilliisuutitat pinnguaatinik neqerooruteqarnissamut akuersissutinik arsaarinninnissamik, tak. § 10, imm. 2, nr. 1, 4 aamma 5, aalajangiinerinik naammagittaalliuutit kinguartitsigallarnermik sunniuteqartassapput, landsskatteretten aallatut aalajangiisimatinnagu.

Imm. 2. Pinnguaatinik neqerooruteqarnissamut akuersissutinik arsaarinninnissamik aalajangiinermit imm. 1-imi taaneqartumit allaanerusunik aalajangiinernik naammagittaalliorneq kinguartitsigallarnissamik sunniuteqarsinnaangillat. Landsskatterettenilli naammagittaalliuut kinguartitsigallarnissamik sunniuteqartussanngortissinnaavaa pissutsit immikkut ittut tamatumunnga tunngavigineqarsinnaappata. Landsskatterettenip aalajangiinera eqqartuussiviit præidentiata, retsformandip imaluunniit landsskatterettenimi kontorchefip aalajangiinerisinnaavaa.

§ 39. Siulersuisuni pisorta qarfimmiluunniit ilaasortat arlaata tunuarnissamik, tak. § 12, imm. 4, pinnguaatinik nakkutilliisuutitat aalajangiinerannik naammagittaalliuutit kinguartitsigallarnissamik sunniuteqarsinnaapput, landsskatteretten allatut aalajangiisimatinnagu.

§ 40. Siulersuisuni pisorta qarfimmiluunniit ilaasortat arlaata, pineqartup Kalaallit Nunaanni pinerluttulerinermik inatsit malillugu akiliisitassatut pineqaatissitassatulluunniit eqqartuuneqarnera pinnguaatinik suliaqarnissamut atornerluisinnaaneranik isumaqalersitsisoq, tak. § 8, imm. 6, pissutigalugu pinnguaatinik nakkutilliisuutitat aalajangiinerinik naammagittaalliuutit kinguartitsigallarnissamik sunniuteqarsinnaapput, landsskatteretten allatut aalajangiisimatinnagu.

Imm. 2. Siulersuisuni pisorta qarfimmiluunniit ilaasortat arlaata pisortanut akilerneqartussamik 100.000 kr.-it sinnerlugu akiitsoqarnera pissutigalugu tunuarnissamik pinnguaatinik nakkutilliisuutitat aalajangiinerannik naammagittaalliuutit kinguartitsigallarnissamik sunniuteqassanngillat. Landsskatterettenilli naammagittaalliuut kinguartitsigallarnissamik sunniuteqartussanngortissinnaavaa pissutsit immikkut ittut tamatumunnga tunngavigineqarsinnaappata. Landsskatterettenip aalajangiinera eqqartuussiviit præidentiata, retsformandip imaluunniit landsskatterettenimi kontorchefip aalajangiinerisinnaavaa.

Kapitali 13

Eqqartuussivinnut misiliisitsineq

§ 41. Pinnguaatinik nakkutilliisuutitat imaluunniit landsskatterettenip aalajangiineri aalajangiinermit qaammatit pingasut sinnerlugit qaangiutereersut eqqartuussivinnut saqqummiunneqarsinnaangillat. Piffissarititaq naatinnagu saqqummiussisoqanngippat aalajangiineq allanngortinneqarsinnaanngilaq.

§ 42. Pinnguaatinik neqerooruteqarnissamut akuersissutinik imaluunniit aqutsisussamut akuersissummik arsaarinninnissamik aalajangiinernik eqqartuussivinnut misiliisitsinerni §§ 38-40 taamatulli atortuutinneqassapput.

§ 43. Pinnguaatinik neqerooruteqarnissamut akuersissutinik imaluunniit aqutsisussamut akuersissummik eqqartuussummi aalajangersarneqarsinnaavoq ingerlatitseqqinnissaq kinguartitsigallanissamik sunniuteqassanngitsoq.

§ 44. Pinnguaatinik neqerooruteqarnissamut akuersissutinik arsaarinnissutaanissamik aalajangiineq, tak. § 10, imm. 2, nr. 1, 4 aamma 5, aalajangiinermit tunngassutilimmit eqqartuussivinnut saqqummiuteqquneqarsinnaavoq. Taamaassanngilarli eqquiniunnerni peqataasut

akiliutaattut katersanik eqquiniutsitsinernut akuersissut pillugu. Eqqartuussivinni misiliisitsinissamik qinnuteqaat aalajangiine lrup pineqartumut nalunaarutigineqarneraniit sapaatit akunneri 4 qaangiutsinnagit pinnguaatinik nakkutilliisuutitanut saqqummiunneqassaaq. Pinnguaatinik nakkutilliisuutitat akuersissutaalik pillugu eqqartuussivimmi suliaassiisapput inuunnaat suliaasaataannik eqqartuussisarnermi pisarnertulli.

Kapitali 14

Inatsisini aalajangikkanik atortitsiniaaneq

§ 45. Akiliisitassatut eqqartuunneqassaaq piaaraluneernikkut mianersuaalliorujussuarnikkullu

- 1) pinnguaammik inatsimmi pineqartumik inatsit manna malillugu eqqortumik akuerineqarani neqerooruteqartoq imaluunniit aaqqissuussisoq, Kalaallit Nunaanni akuerineqanngitsutut pinnguarnermi peqataatitsiniaasooq, imaluunniit pyramidespil-inik taaneqartartunik Kalaallit Nunaanni neqerooruteqartoq,
- 2) § 8, imm. 5-imi 2. pkt.-imik, aamma imm. 7-imik, § 9, imm. 3-mik, § 12, imm. 1-imik aamma 3-mik, §§ 13-imik, 15-imik aamma 16-imik, § 17, imm. 1-imik, § 20, imm. 3-5-imik, § 22-mik, § 27, imm. 1-imik aamma 3-mik, § 28, imm. 2-mik, § 29, imm. 2-mik, § 31-mik imaluunniit § 32, imm. 3-mik imaluunniit 5-7-imik unioqutitsisoq,
- 3) Pinnguaatinik inatsit malillugu akuerisaanngitsunik ingerlatsinissamut ininik atugassiisoq,
- 4) § 18 malillugu aalajangersarneqartutut patsisissaatitanik sumiginnaasooq,
- 5) pinnguaatinik, inatsit manna malillugu akuerisaanngitsunik neqeroorutillit sinnerlugit ussassaarisooq,
- 6) pinnguaammi inatsit malillugu akuerisami akuersissutaalik akuersiseqqaarnagu peqataatitsiniaasooq inuussutissarsiutiginnissaa siunertaralugu,
- 7) pinnguaatit akuerisaanngitsut atorlugit inuussutissarsiorniartoq, imaluunniit
- 8) akileraarutit pillugit misissuisunut atugassatut eqqunngitsunik paatsuunganartunillu paasisutissiisoq imaluunniit paasisutissanik nipangiussiinnartoq.

Imm. 2. Pissutsit sakkortunerusut tunngavigalugit, tamatumani pingaartumik nangeqattaartumik pisoqartillugu, imaluunniit inatsinik unioqutitsineq immikkut annertussuseqartillugu Kalaallit Nunaanni pinerluttulerinermik inatsit malillugu pineqaatissiinerit eqqartuussutaasinnaapput.

§ 46. Peqqussutini, inatsit naapertorlugu suliaasussani aalajangersarneqarsinnaapput piaaraluneernikkut imaluunniit mianersuaalliorujussuarnikkut peqqussutini aalajangersakkanik unioqutitsinerit pillaatitut akilisitsissutigineqarsinnaanerit.

§ 47. Piginneqatigiiffiit il. il. (inatsisitigut aqutsisorisaat) pinerluttulerinermik inatsisitigut akisussaaffilerneqarsinnaapput Kalaallit Nunaanni pinerluttulerinermik inatsimmi kapitali 5-imi malittarisassat malillugit.

§ 48. § 45, imm. 1, nr. 1 aamma 5, malillugit akilisitsissutsissutissanik annertussusiliinerni Kalaallit Nunaanni pinerluttulerinermik inatsimmi tunngavigisassat saniatigut sulliviup kaaviaartitai pingaartinneqartassapput. Akiliisitsissutissanik, aamma tapiutitut akiliisitsissutissanik, annertussusiliinerni immikkut pinngaartinneqartassapput aningaasatigut iluanaarutit imaluunniit iluanaarutiginiakkat annertussusiat.

Kapitali 15

Atuutilersitsinermik ikaarsaariarnermillu aalajangersakkat

§ 49. Piffissaq inatsisip atuutilerfissaa akileraartarnermut ministerip aalajangersinnaavaa. Akileraartarnermut ministerip ilanngullugu aalajangersinnaavaa inatsimmi aalajangersakkat piffissani assigiinngitsuni atuutilersinneqassasut, taamaattorli imaalillugu § 35 aamma § 36 atuutilersinneqassasut § 6-ip atuutilersinneqarfianiit ukioq ataaseq qaangiuppat.

§ 50. Inuk, inatsit atuutilersinneqartinnaguli pisiniarfimmi eqqorniagassanik eqquiniunnernillu nioqquteqarfimmi aqutsisuusoq akuerineqarnissamik qinnuteqassanngilaq.

Imm. 2. Inummut inatsisip atuutilersinneqarfia sioqqullugu pisiniarfimmi annerusumik eqqorniagassanik eqquiniunnernillu nioqquteqarfiusumi atorfeqartitamut inatsimmi § 13 atuutinneqassanngilaq.

§ 51. Pinnguaatit pillugit inatsimmi nr. 848, 1. juli 2010-meersumi makku allannguutaassapput:

1. § 26 *imm. 1, nr. 3*, imatut oqaasertaqassaaq:

”3) aaqqissuusseqqinnissaq, akilisinnaajunnaarneq imaluunniit akiitsutigut isumakkeerinissaq imaluunniit aaqqissuuteqqittatut suliarineqarneq, akiliisinnaajunnaartutut suliarineqarneq imaluunniit akiitsutigut isumakkeerinissaq pillugit qinnuteqaammik tunniussaqaarsimanngitsoq.”

2. § 42, *imm. 5-imi 2.-4.pkt.*-itut ikkunneqassapput:

”Akiliutissaq akilerneqassaaq kingusinnerpaamik qinnuteqaammik tunniussinermut peqatigitillugu. Qinnuteqaat itigartinneqarpat, qinnuteqartumut 25.000 kr. utertinneqassapput. Aningaasat taakku iluarsiivigineqassapput inuinnaat il.il. aningaasarsianit akileraarutaat pillugit inatsimmi § 20 malillugu.”

3. § 45, *imm. 2, 1.pkt.*-imi ”akiliisarnermik unitsitsinermik nalunaaruteqarpoq” iluarsineqassaaq uunga: ”aaqqissuuteqqinneqarpoq”, aamma ”akiliisarnermik unitsitsinermik nalunaaruteqarneq” ukununnga: aaqqissuusseqqinnissamik suliarineqarnerup aallarnernissaa”.

4. § 66, *imm. 2*, imatut oqaasertaqassaaq:

”*Imm. 2.* Akileraartarnermut ministerip aalajangersinnaavaa inatsimmi aalajangersakkat piffissani assigiinngitsuni atuutilersinneqassasut.”

5. § 69, *nr. 1*, atorunnaassaaq.

6. § 72, *imm. 3-mi* ”neqeroorutaassaaq” allanngortinneqassaaq uunga:”tuniniarneqassaaq”.

7. §§ 73-75 atorunnaassapput.

§ 52. Pinnguaatit ilaat, eqqorniagassat eqquiniunnerillu pillugit inatsimmi, tak. inatsimmik nalunaarut nr. 273, 17. april 2008-meersoq, kinngullermik inatsimmi nr. 848, 1. juni 2010-meersumi § 69-ikkut allannguuteqartitami, makku allannguutaassapput:

1. § 10-mi *imm. 7*-itut ikkunneqassapput:

”Imm. 7. Imm. 1 aamma 3 naapertorlugit akiliisitsissutissanik annertussusiliinermi pillaaarnermik inatsimmi tunngavigisassat nalinginnaasut saniatigut sulliviup kaaviaartitai pingaartinneqassapput. Akiliisitsissutissanik, ilanngullugit tapiutitut akiliisitsissutissat, annertussusiliinermi immikkut pingaartinneqassapput aningaasatigut iluanaarutaasimasut imaluunniit iluanaarutiginiaraluakkat annertussusii.”

§ 53. Pinnguaatinit akileraarutit pillugit inatsimmi nr. 698, 25. juni 2010-meersumi imaattut allannguutaassapput:

1. § 13, imm. 2, nr. 1-imi ”13, imm. 1, nr. 18” imaalissaaq: ”§ 13, imm. 1, nr. 17”.

2. § 35, imm. 1, imatut oqaasertaqassaaq:

”Akileraararnermut ministerip piffissaq inatsisip atuutilersinneqarfissaa aalajangissavaa. Akileraararnermut ministeri aalajangiisinnaavoq, inatsimmi aalajangersakkat piffissani assigiinningsuni atuutilersinneqassasut, taamaattoq tak. imm. 2 aamma 3.”

3. § 35-mi imm. 7-itut ikkunneqassapput:

”Imm. 7. Aningaasat ininut pinnguaateqarfinnut inatsisip atuutilersinneqarnera sioqqullugu akuersissutinik piginnittunit akileraarutinut ikililerutitut agguaassassanngortitaasinnaasut, taamaallaat agguaatassanngortinneqarsinnaapput kommunimi inip pinnguaateqarfiup inissisimaffigisaani tamanut iluaqutaasussatut siunertanut, inatsisip atuutilersinneqareerneragut piffissaq agguaassivissaq apeqqutaatinnagu.”

§ 54. Kasinoni pinnguaatit pillugit inatsimmi, tak. inatsimmik nalunaarut nr. 861. 10. oktober 1994-imeersoq, allannguuteqartitaq, inatsisikkut nr. 443-ikkut 34. maj 2000-imeersukkut, inatsimmi nr. 366, 24. maj 2005-imeersumi § 5-ikkut, inatsisikkut nr. 420, 9. maj 2006-imeersukkut, inatsimmi nr. 538, 8. juni 2006-imeersumi § 27-ikkut aamma inatsimmi nr. 718, 25. juni 2010-meersumi § 13-ikkut, makku allannguutaassapput:

1. § 9 a, imm. 4-mi ”politiit” kingornanut ikkunneqassapput: ”aamma pinnguaatinik nakkutilliisuutitat”.

2. § 13-imi ”politiit” allanngortinneqassaaq ukununnga: ”pinnguaatinik nakkutilliisuutitat”.

3. § 20-mi ”Politiit” allanngortinneqassaaq ukununnga: ”Pinnguaatinik nakkutilliisuutitat”.

4. § 20 a, imm. 2-mi ”kommunimi kasinoni pinnguaatit inissisimaffigisaanni kommunip aqutsisoqarfiani atorfeqartitat akornanni kommunalbestyrelsi piffissamut ukiunut marlunnut” allanngortinneqassaaq ukununnga: ”pinnguaatinik nakkutilliisuutitat aamma taamaallaat pinnguaatinik nakkutilliisuutitanut ilitsersorneqartussaasut”.

5. § 20 a, imm. 3, 1. pkt.-imi ”kommuni” allanngortinneqassaaq ukununnga: pinnguaatinik nakkutilliisuutitat”.

6. § 20 a, imm. 3, 2. pkt. atorunnaassapput.

7. § 20 a, imm. 4 aamma 5 atorunnaassapput.
Taamaalilluni imm. 6 imm. 4-nngussaaq.

8. § 20 b, imm. 1, 3. pkt.-imi aamma § 20 b, imm. 2, 2. pkt.-imi piissapput ”§ 20 a, imm. 5, naapertorlugu”.

9. § 24, imm. 1, nr. 1-imi ”aamma 5” piissapput.

10. § 24-p kingornanut ikkunneqassapput:

”§ 24 a. Kommunimi atorfeqartitat kasinonik nakkutilliinermi suliassanik taamaallaat pingaarnertulluunniit suliqartitat akileraartarnermut ministereqarfimmut nuussapput.

§ 24 b. Pisussaaffiit pisinnaatitaaffiillu sullivinnik nuussisoqartillugu akissarsisartut inatsisitigut inissisimanerat pillugu inatsisip kingunerisassai taamatulli atortuutinneqassapput sulisorisanut ataatsimoortunik isumaqatigiissutinut, akissarsiatigut sulinikkullu atugarisatigut aalajangersakkanut, pisortani oqartussaaitanin aalajangersarneqartunut imaluunnit akuerisanut, imaluunniit ataasiakkaat pillugit isumaqatigiissutinut naapertuuttumik atorfinitsitanut aamma sullivinnik nuussisoqartillugu akissarsisartut inatsisitigut inissisimanerat pillugu inatsimmi § 24 a malillugu nuutinneqarnermut atasumik pineqanngitsunut.

§ 24 c. Tjenestemandit, § 24 a malillugu nuunneqartussat, atugassarititat nuunnerup pinerani atugassarititaasunut naapertuuttut tunngavigalugit naalagaaffimmi atorfinitsitaanermut nuussapput.

Imm. 2. Tjenestemandit imm. 1-imi pineqartut taamatut atorfinitsinermit soraarninngornermi naalagaaffimmit tjenestemandit tamarminusunik soraarnerussutisisinneqassapput.

Imm. 3. Aningaasanut ministeri nunagisami pissutsinut ministeri aamma peqqinnisamat ministeri isumaqatiginiareerlugit malittarisassiussaaq pisorta qarfiup nuunneq tikillugu atorfeqarfiusup pisorta qarfiullu atorfeqarfiulersup akornanni tjenestemandinut § 24 a malillugu nuunneqartussanut soraarnerussutisiatigut pisussaaffinnik naatsorsuisarneq immaqalu agguataarinissaq pillugu.

Imm. 4. Aningaasanut ministeri nunagisami pissutsinut ministeri aamma peqqinnisamat ministeri isumaqatiginiareerlugit malittarisassiussaaq imm. 2 aamma 3 malillugit soraarnerussutisiassanik naatsorsuisarneq, aqutsineq, utertitsisarneq, kukkuneruineq il. il. pillugit.

Imm. 5. Aningaasanut ministeri imm. 3 aamma 4 naapertorlugit nalornisoortit pillugit aalajangiissaaq.

Imm. 6. Imm. 2-5 taamatulli atuutinneqassapput sulisorisanut tjenestemandit assigalugit soraarnerussutisiatigut aqqissuussivigisaanikkut annertuumik pisinnaatitaaffeqartunut.”

Tunniunneqarput Amalienborgimi, ulloq 22. marts 2011

Kunngiussutitsinnik Atsiorpugut Naqissusiillutalu

DRONNINMGIP AQQANI:

FREDERIK
KUNNGISSAQ

/Peter Christensen